

紀古滇說集序

雲南古爲滇國天則參井餘氣地期深矣
裔土故其沿革附于巴蜀河圖緯所謂南
中爲蜀之苑囿是也史記西南夷傳斑固
范曄衍之至晉常璩作南中志附于華陽
國志詳矣余家重膺

天恩世守滇雲戎政之暇求滇之遺跡病其
略也蓋史之體內華夏而外荒徼今也九

州同城四海一貫固不厭其詳且煩也於
類書所引楊子雲蜀本紀譙周異物志僅
存千百於一二若任豫之益州記常璩雲
南事狀常齊沐之雲南行記樊綽之雲南
志南蠻記皆名存而籍亡久矣莫可徵也
家所舊藏有紀古滇說集乃元人張道宗
所錄始自唐虞訖于咸淳方域年運謠俗
服叛一一詳焉雖其文不雅馴而鑿鑿傳


信不可刪以迷其真也其紀金馬事大與漢書所謂金形似馬碧形似鷄之說迥異文儒信史者多疑之余謂是書本偏方所錄自言風土當得其實漢使王褒祭金馬碧雞之神望其地不至又安能必其說為信而此所錄可疑乎並存之可也遂命梓人鐫之上以廣

國家方興一統之盛下以補職守忠愛萬

一之禪觀者幸鑒鄙意焉

嘉靖己酉十又二月朔日

欽差鎮守雲南總兵官征南將軍右軍都督
府都督僉事沐朝弼謹序



紀古滇說原集

古滇始自唐虞而前漸漸有野人授土號法外君長
唐分命仲宅西曰昧谷虞導黑水至於三危入于南
海大禹治水命神庾辰徇南海分派江河流沙金色
故名金沙入昧谷見水多聚於山頂溪池廣遠谷島
高峙乃曰滇水滇水周三百里其地萬里皆蠻夷所
有西窮極有大秦國身毒國義渠國緄濮國荼弼沙
國有聖人名徂葛尼到此諸國皆有君長荼弼沙是
日落之所有大洋日入其洋矣外有緬夷諸國西南
濱海黑水所流八百日南占城真臘登流眉賓童童

國有王舍城中目連舍基此南海濱也與滇水相去
不遠自此西南夷君長以十數夜郎最大其西靡莫
之屬以十數滇最大自滇以北君長以十數邛都最
大此皆魍結耕田有邑聚其外西自同師以東北至
牁榆名爲雋昆明皆編髮隨畜遷徙毋常處毋君長
地方可數千里自雋以東北君長以十數毋駝最大
其俗或土著或移徙在蜀之西自毋駝以東北君長
以十數白馬最大皆氐類也此皆巴蜀西南外蠻夷
也

周宣王在位四十六年時乃周室中興遠聞西南有

身毒國即天竺國也先昭王二十一年有淨梵王妃
摩耶氏生太子悉多不欲爲君長入山禿髮也至宣
王時西天竺亦有國曰摩耶提乃王也是淨梵王摩
耶之後裔也摩耶提名阿育生三子長曰福邦其名
也次曰弘德季曰至德三子俱健勇因父阿育王有
神驥一匹身高八尺紅鬃赤尾毛有金色三子共爭
之王莫能決乃曰三子皆一也與一則偏一而不愛
於二也乃命左右曰將我神驥縱馳而去有能追獲
者主之乃一縱直奔東向而去三子各領部衆相與
追逐其季子至德先至滇之東山而獲其神驥就名

其東山以爲金馬山長子福邦續至滇池之西山聞
季子以獲其馬停憇於西山之麓忽有碧鳳呈祥後
誤目山曰碧雞次子弘德後至滇之北野各主之不
回王憂思滇類衆恐未獲歸乃遣舅氏神明統兵以
應援將歸不期哀牢夷君主阻兵塞道而不復返矣
哀牢國永昌郡也其先有郡人蒙迦獨妻摩梨羌名
沙一居於牢山蒙迦獨嘗捕魚爲生後死牢山水中
不獲其屍妻沙一往哭於此忽見一木浮觸而來旁
邊漂沉離水面少許婦坐其上平穩不動明日視之
見水沉觸如舊遂嘗浣絮其上若有感因懷妊十月

孕生九子復產一子共男十人同母一日行往池邊
詢問其父母指曰死此池中矣語未畢見沉木化爲
龍出水上沙一與子忽聞龍語曰若爲我生子今俱
何在九子見龍驚走獨一小子不能去母固留之此
子背龍而坐龍因舐之就喚其名曰習農樂母因見
子背龍而坐乃鳥語謂背爲九謂坐爲隆因其名池
曰九隆習農樂後長成有神異每有天樂奏於其家
鳳凰棲於樹有五色花開四時常有神人衛護相隨
諸兄見有此異又能爲父所舐而與名遂共推以爲
王主哀牢山下哀牢山又有一人喚奴波息者夫婦

復生十女子因與習農樂兄弟皆娶以爲妻奴波息見習農樂有神異遂重愛之而家大旺鄰有禾夢和者嫉欲害之習農樂奉母夜奔魏山之野躬親稼穡修德惟勤教民耕種其九弟兄有妻後漸相滋長種人皆刻畫其身象龍文衣著尾習農樂在於魏山之野主其民咸尊讓也有梵僧續舊緣自天竺國來乞食於家習農樂同室人細密覺者勤供於家而餉夫耕前則見前僧先在耕所坐向問其言僧曰汝夫婦雖主哀牢勤耕稼穡後以王茲土者無窮也語畢騰空而去乃知是觀音大士也復化爲老人自鑄其像

留示其後今阿蹉觀音像者是也大將軍張樂進求
後來求會諸首合祭於鐵柱鳳凰飛上習農樂之左
肩樂進求等驚異尚其有聖德遂遜位其哀牢王孫
名奇嘉者以蒙號國也

前哀牢王兵阻其道阿育王三子不復返矣遂歸滇
各主其山後值楚莊王遣將莊躄總兵循江上略巴
蜀黔中以西躄至滇也見池方三百里旁平地肥饒
數千里以兵威定滇民服焉欲歸報會秦并六國擊
奪楚巴黔中郡道塞不通因還以其衆王滇其阿育
王三子并神明四甥舅之遺衆與躄兵同諸夷雜處

躋爲滇王崇信佛教不忍殺生遷居白崖鶴拓浪穹
後衆推仁果者爲張姓新君之滇王躋傳世卒矣仁
果肇基白崖尚勗業之祥於茲遂以地號國曰白操
存五常之固有不昧一真之虛靈堅守三綱修明六
藝本戒法於天竺枝姓文於漢唐言從善間於諸語
服隨世俗於時宜號年法古正朔從夏採撫諸家之
善自集成於一枝而爲白氏國也

秦滅漢興漢武帝元狩元年夏五月遣博望侯張騫
請通西域自大夏使還大夏在漢西南慕中國患匈
奴隔其道誠通蜀身毒國道使近又無害塞爲還謂帝

前言又曰身毒國乃天竺國也去蜀不遠帝再遣騫
道通滇爲益州亦曰昆明用張仁果爲滇主通商賈
貿易用貝於是漢天子再遣王然于栢始昌呂越人
等十餘輩間通西南夷指求身毒國至滇滇王張仁
果尚在白崖後騫雖奉命冊之而張仁果仍白氏國
也王然于等所會滇王當羗亦莊躑之遺也迺留然
等求道四年餘皆閉昆明莫能通滇王與漢使者言
曰漢我孰爲大及夜郎侯亦然各自以一州王不知
漢廣大使者還因盛言滇大國足事親附天子注意
焉後王然于以粵破及誅南夷兵威風諭滇王入朝

至元狩三年作昆池以習水戰元鼎六年漢平西南夷置五郡元封二年秋漢遣將軍郭昌發巴蜀兵擊滅勞深靡莫以兵臨滇滇王降以其地爲益州郡賜王玉印復長其民是時漢滅兩越平西南夷置初郡十七而初郡時時小反殺吏發卒誅之六年郭昌將兵擊昆明又有中郎將衛廣者同昌討平滇國

孝昭帝始元元年夏益州夷反募吏民發犍擊破之四年秋又反復遣兵擊之神爵元年春三月漢宣帝遣諫議大夫王褒求滇金马碧雞之神神乃阿育王之仲季子也因收金马見碧

鳳騰翔各以山主之及兄福邦舅神明俱為神矣

又見

後王褒由川之來路道險遠弗果在蜀而望滇賽之

漢平帝元始元年春正月滇王獻白雉於朝

王莽天鳳元年秋益州蠻夷殺其大尹莽發兵擊之
三年冬莽大發兵擊益州滇王領率諸蠻會兵迎敵
莽兵敗回蠻夷亦殺其太守莽遣寧始將軍廉丹發
巴蜀吏人及轉兵穀卒徒十餘萬衆擊之吏卒疫連
年不能剋而返莽以文齊為太守開通路道灌漑墾
田三千餘頃率厲兵馬修障塞降集群夷甚得其和
及公孫述據益土文齊固守據險述拘其妻子許以

封侯齊遂不降聞光武即位乃間道遣使自聞蜀平
徵為鎮遠將軍封成義侯於道卒詔起祠堂立廟祀
之建武八年滇王屬夷渠師棟蚕與姑復揅揄檉棟
連然池建寧昆明諸種反叛殺長吏益州太守繁勝
與戰而敗退保朱提十九年光武帝遣武威將軍劉
尚等發廣漢犍為蜀郡兵及朱提夷合一萬三千人
擊之尚軍遂渡瀘水入益州界群夷聞大兵至皆奔
壘奔走二十年連與棟蚕等大戰數月滇王退兵昆
明劉尚追棟蚕至不韋斬之虜七千餘人得生口五
千七百馬三千匹牛羊二萬餘頭夷遂平漢明帝永

平十二年春哀牢王內附章帝建初元年哀牢王反
伐滇滇王兵及郡兵擊斬之併哀牢也安帝元初五
年卷夷大牛種封離等久叛遂殺守令次年永昌益
州諸夷皆叛詔遣益州刺史張喬從事楊竦將兵擊
破之竦病死喬痛惜之乃刻石勒銘圖畫其像時有
神馬四匹出滇池三國蜀漢丞相諸葛亮南征自越
雋乃建興三年春至南中所在戰捷由是斬雍闓等
雍闓者乃益州郡之耆帥阻拒漢兵亮斬之遂平時
子孟獲僭爲蠻王誘扇諸夷將牂越雋皆應孟獲其人
素爲夷漢所服占據昆明東川武定以及烏撒沾蒙

數千里地其衆數萬亮經會川歷三絳也定弄棟姚安

也而抵永昌斷九隆山脉以歇王氣遂將子孟獲生擒

於營使觀營壘七縱七擒以知亮有天神也回兵白

崖立鐵柱以紀南征改益州郡曰建寧以仁果十七

世孫張龍佑領之別遣將略興古也牂牁順元朱

提也烏蒙等郡晉光熙元年春三月五峇夷寇寧州刺

史李毅卒太寧元年寧州刺史王遜死之八年春三

月寧州降于成也四川太元二年春西南夷遣使朝于

秦

十七年冬月以殷仲堪為都督總荆益寧三州諸軍

事

隋開皇十七年二月遣太平公史萬歲討南寧羗平
之萬歲京兆人拜左領軍將軍南寧夷名爨翫者來
降拜昆明刺史旣而復叛萬歲復征之自蜻蛉川經
弄棟小勃弄大勃弄至於南中賊前後屯據要害萬
歲皆揮兵破之行數里見孔明紀功碑銘其背曰萬
歲之後勝我者過此萬歲遂令左右倒其碑見其座
下刻石在內曰隋開皇十九年將軍史萬歲至此重
扶其碑遂立之惶恐再拜而進渡西洱海入渠濫川
行千餘里破其三十餘部爨翫以金寶賂萬歲歲還

朝以罪除名

唐張仁果三十三代孫張樂進求改建寧爲雲南唐
冊樂進求爲首領大將軍雲南王樂進求因祭鐵柱
見習農樂有金鑄鳳凰飛上左肩樂進求等驚異之
遂遜位其哀牢王孫王以蒙號國王曰奇嘉社稷之
初於斯故稱蒙社乃唐高宗永徽四年卽蒙十三王
之鼻祖也

先是唐遣大匠恭韜徼義至蒙國於開元元年癸丑
歲造三塔於點蒼山下建崇聖寺於塔之上倚山臨
水無不精麗塔高三百餘尺崇高十六級

第二興宗王樂誠有治國之風夷民安堵厥後威成
王誠樂立乃第三世也王威服諸邦崇信佛教時有
滇人揚道清者殉道忘軀日課經典感現觀音大士
遐邇欽風漁者焚網於滇水之旁酒家隳其器具皆
以利物爲心蒙氏威成王聞知及親幸於滇冊道清
爲顯密融通大義法師始塑大靈土主天神聖像曰
摩訶迦羅築滇之城以龜其形江縈之蛇其相取義
易之旣濟王慕清淨法身以摩訶迦羅神像立廟以
鎮城工五年龜城完也廟隅有神匠曰羅都道太自
蜀中來塑像將成又有菩提巴坡者自天竺至以祕

呪丹書神位爲種子創廟中城而奉之大義法師又以菩提珠分一樹庭之西期以興廢歲九樹三枯復挺一株盛茂於是大靈赫赫以保黎民調風順雨干戈偃息王建都城中開爲天府祛邪輔正爲事復像二神一鎮龜城之頂一鎮城之南靈德一然王九年追封阿育王三子一舅皆謚以帝號而神主各山以廟祀之長子福邦爲碧雞山主廟山之下謚曰伏羲山河清邦景帝次爲靈伏讎夷滇河聖帝三爲金馬名山至德景帝廟於金馬山麓謚舅氏神明乃曰大聖外祖神明天子廟亦碧雞山主廟之左時六詔之

渠帥曰蒙社詔越嶲詔浪穹詔施浪詔澄賧
詔國相張建成始服五詔又三年王遣張建成朝唐
建成乃喜州人也入覲過成都大慈寺適寺初鑄神
鍾以成寺僧戒曰擊鍾一聲施金一兩時建成連扣
八十聲僧驚問曰汝何人連扣如此曰吾南使張建
成也僧乃易其名曰化成成曰佛法南矣遂學佛
書歸授滇人成至京朝唐時玄宗在位厚禮待之賜
以浮屠像而歸王崇事佛教自茲而啓王遣將守龜
城以還蒙社有李和尚名紹祖者精密法教與道清
顯聖嘗持一鐵鉢盂入定不語民稱曰無言和尚與

楊國師賭手段也欲晴則鉢內火光燭天遂晴欲雨則鉢內白氣上騰升雲遂雨王亦封爲灌頂國師一日王詔紹祖於崇聖寺講經有老翁立聽畢忽乘風雲而去王驚問曰此洱水之龍也後王逝子歸義王立乃第四世也王名魁樂覺於戊辰年卽位遣部將平五詔威聲大振時唐玄宗開元十五年也五詔遂平服唐冊王爲特進雲南王越國公歸府議同三司自唐進封之後永昌諸郡緬鮮羅大秦此皆西通之國交趾八百真臘占城撾國此皆南通之國俱以奇珍金寶鹽錦氎布琿瑇巴貝歲進於王不缺於是漸

有昌也王崩子覺羅鳳覺亦作間立始建元曰長壽唐遣

中使黎敬義持節冊封覺羅鳳為雲南王時有建南

節度使鮮于仲通姚州太守張虔陀間度蒙有隙也

神武王遂分將障隘各處築城畜武習馬練兵王據

大理城與雲南城上下聯絡固修城郭曰威楚州城

太和城此城原是習農樂自蒙社徙所建築也羊首

咩城白崖城此城張樂進求建築也文案洞城亦樂

進求原所居也於是通修理之又鄧川東十里鄧賤

詔之妻名慈善者因詔先被平慈善築城負固之神

武王親率兵去欲妻之慈善堅執不從誓曰一女不

更二夫乃居城以自守王領兵因攻之不克慈善卒
王嘉其節賜號德源城亦修理之城東去七十里有
甸言川其川源平坦山勢回合周有二百餘里乃雲
南州又築一城焉州西北十餘里山麓間有石如鏡
光可照面舊名鏡州先張樂進求時州北龍興和山
忽五色雲起蕭索輪囷終日不散以爲祥州居雲之
南因樂進求改名雲南亦築城焉至河尾關乃洱水
之下流也蒼山之勢羣波爭道疊水懸流奔注雲濤
雪浪翻騰聲若如雷合洱海有兩關曰龍尾關曰龍
首關此上下雙關也皆神武王所築之八年各城始完

兵亦練熟結好土蕃以逸待勞矣唐玄宗天寶九年
虔陁飲醜卒十年遣鮮于仲通帥師伐蒙大戰於趙
州之西唐師敗績十三年六月再遣前雲南郡都督
李宓廣南節度使何履光統雄兵二十萬再伐大蒙
又戰於龍尾關東唐兵敗績將士卒多死之覺羅鳳
曰天子致討兵士何辜遂斂屍葬之爲萬人塚其塚
如山之高也王遂得唐西瀘令姓鄭名回回者巨儒
也蒙王請回以師禮之賜爵國賢大丞相宰輔清平
官文風始大振矣立蒙國大詔德政之碑在太和城
王崩子孝桓王立乃第六世也王名意慕新仍以鄭

回爲相凡事皆從回說卽位之初建元上元唐德宗
貞元之初也六年使西川節度使韋臯詣蒙修好于
唐臯字成武京兆萬年人也貞元初代張延賞爲劍
南節度使唐因蒙附結土蕃連敗唐師乃使臯至蒙
和好臯至蒙王意慕新與丞相鄭回商確回唐乃以
臯言請修舊好蒙詔從之八年遣使崔佐時謝請和
好唐再遣祠部郎中袁茲來蒙宣詔時憲宗元和年
也冊號蒙爲南詔王賜元和金印詔賜滇城爲善禪
遣弄棟節度使王嵯巔詣善禪創建覺照慧光二寺
命太匠尉遲公燒造磚石皆勒其匠名始建雙塔以

為善禪浮屠及創妙應講寺并一小塔于後滇人崇
尚善之未幾孝桓王卒乃唐元和三年也唐詔太常
卿武少儀持節祭葬第七孝惠王名新覺勸遣使貢
唐伴唐使同歸新覺勸立建元應道群臣上尊號曰
驃信帝驃信也唐亦遣使冊新覺勸為雲南王特新覺
勸因以稱帝以善禪城為東京太和城為西京帝諸
東京唐使至矣使乃徐雲虔也雲虔為嶺南西道節
度使辛讜遣使如南詔雲虔至善禪城驃信詔入問
唐遣來意雲虔與之抗禮王怒曰汝何無禮乎雲虔
曰王之先由大唐之命得合六詔為一恩德深厚中

間乖隔罪在邊鄙今驟信若欲修好念舊豈可違祖
考之故事乎順祖考孝也事大國義也息戰爭仁也
審名分禮也四者皆令德也而可不勉乎驟信曰吾
欲遣人與唐約為舅甥也吾何肯表貢之於唐乎今
聞爾言四者令德之語授爾木夾遣還然終不肯受
冊奉貢乃僭稱帝號於善禪也後卒其子勸龍成立
是為幽王建元龍興罷帝號而與唐和未幾而卒時
穆宗長慶三年也穆宗遣少府少監李銑詣善禪葬
祭其子勸禮立乃第九世也建元全義以王嵯顛為
相先是第六祖孝桓王意慕新封點蒼山為中嶽至

王亦大祀之仍封中嶽蒼山羣臣上尊號曰靖王王
建昭靈育物土主廟在城北創中嶽神祠在城西中
峯之下善禪慧光覺照二寺并塔落成王卒其子昭
成王勸豐祐立建元保和乃蒙第十世也唐史文宗
太和三年王嵯巔領兵攻雋郾戎三州遂入蜀止西
効十日慰賚居人取其經籍掠工技數萬人南之工
織自是與中國同唐大中十年南詔王勸豐祐建五
花樓以會西南夷十六大國君長也樓方廣五里高
百尺上可容萬人昭成王保和五年已建完也保和
八年昭成王幸善禪東京樹碑於金馬以絕方物王

卒於善禪葬起蒙舍其子世隆立乃第十一世也世隆即位建元建極稱景莊帝國號大理改西京曰中都善禪東京曰上都元年帝遣大將軍獨彥侵播州又侵武州皆陷之二年攻安南邕州亦陷之八年遣清平官董成入唐求授敵國禮冬復寇安南次年春陷之交阯唐經略使蔡襲死之是時乃唐懿宗咸通四年也建極十一年又犯蜀掠工匠玉帛以歸自是盡有大渡河迤南之地十三年王遣使至品甸按唐史嘗置坡州亦名清子川其川澤土壤不減雲南而民種蒔為不及爾甸中有池名曰清湖灌溉之利達

於雲南之楚湖西官道中有石石上紋如古篆號曰地符王因遣使禁行人謹避不許踐之又山行三十里至白岩甸其地行南北袤大小略與雲南品甸相埒居民甚衆禾麻蔽野西有石岩削壁其色如雪故曰白岩又有赤水江回環曲折經於其中建行宮于白崖甸中親履甸之西南建清致神廟寬廣精麗中立鐵柱高七尺五寸徑二尺八寸上題曰建極十三年壬辰四月庚午朔十有四日癸丑鑄以鎮其川實唐咸通十二年也王回朝遣將襲嘉黎雅三州皆陷之又進犯成都甲午建極十五年乃唐僖宗乾符元

年冬景莊遣使寇西川陷黎州入邛峽關掠工匠玉帛金銀男女而歸建極十九年春二月景莊卒子隆舜立稱為宣武帝即位之初改國號大封民國建元貞明三年幸善闡城仍為東京祭阿育王子金馬碧雞二山景帝及祀神明天子各廟立遷都郊祀山川社稷二壇於善闡東京城外山川壇西南又築一城與其子舜化所居名曰中城卒於東京葬起大封名國其子舜化立乃十三代也舜化即位東京建元中興稱為孝哀帝唐乾符六年春嶺南節度使辛讜復遣使來廣明元年夏六月僖宗遣宗正少卿李龜年

至善闡與南詔和親次年又改元中和元年秋八月遣使上表于唐三年冬唐遣中使以宗女妻之舜化於唐昭宗乾寧四年冬十二月遣使上書于唐孝哀帝輕車回大封民國入太和城宮被鄭買嗣弑之買嗣遂篡其位國號天長改元安國初買嗣為宣武之相宣武幸善闡留買嗣以守國豈期弑孝哀而篡其位也後有趙善政楊于貞等遞相篡位三主共三十六年而至武威人段思平乃五代晉時也

段思平得之更國號曰大理始稱先帝蒙段同四十一主共歷六百有一年皆都於善闡大理也善闡金

碧為城昆水為池大理西倚點蒼東挾洱水點蒼之
險洱水之阨龍首關於鄧川之南龍尾關於趙臉之
北蒙鄭趙楊段五姓數百年之間五姓守固值唐末
五季衰亂之世兵不遠及五姓之主互與中國抗宋
興北有大敵不暇遠略使傳往來不通於中國邦人
以去天竺不遠其俗多尚浮屠法家無貧富者皆有
佛堂人不以老壯手不釋數珠一歲之間齋戒幾半
絕不如葷飲酒至齋畢乃已沿山寺宇極多而禮佛
遊翫者弗絕至大元世祖天兵北來進麗江石門關
一鼓而下其國乃終

大理摩訶羅嵯段興智建元天定元年而降于元世祖以天戈南望風納款豈以金城湯池傳之萬世乎郭松年大理行曰良可歎哉此非在德不在險之明驗大効矣

元仍立段信苴實留守大理是以削其號也蒼溟底定元帝命信苴實大將睦力合兵東征於越段興智同信苴福為副行征所向皆克回至京賞賚甚厚與智死元遣使諭祭賜物以歸葬還大理乃嘉曆數之祥乃宣諭信苴實曰向帥我師往臨爾境重拒國人之請因從誠信之盟蟻附而來忠勤益著庸爾至優

之溼彰以同視之仁可賜虎符依舊管領大理善闡
威楚統矢會川建昌騰越謀統等州城勾當仍悉各
處萬戶千戶隊長管民之官屬並聽信苴實節制尚
修前效毋負初心撫安已附之民招集未降之衆國
典有常卿其勉之宜令准此即元中統二年也任信
苴實為大理宣慰使司世襲都元帥階鎮國復陞雲
南行省叅知政事故子信苴慶繼襲父職階亦如之
中慶路總管高龍繕為左丞階資善俾段之子孫世
世榮享於舊

皆

咸淳元年春正月初八日滇民張道宗錄

紀古滇說原集終

紀古滇說原集

六

跋紀古滇說集

總戎雲樓沐公命梓人刻紀古滇說集慎
得披閱焉曰茲野史之流郡乘之禪也比
于虞初九百之說方朔三千之牘要爲有
係不涉無益傳之不亦可乎竊謂

公之命梓是也有四善焉訊俗一也辨方
二也好古三也崇文四也其爲文教之揆
武衛之奮以承

九重付畀之重一方式過之略於茲乎取焉
謹跋之於卷尾云

嘉靖己酉十二月朔日治屬博南成史楊慎
謹書

跋紀古滇說集終



